

中华古典文学丛书



证治汇补(三)

责任编辑：陈国勇

(6)



广州出版社

图书在版编目(CIP)数据

中华古典文学/丛书. 陈国勇 主编. 广州出版社. 2004. 12

ISBN 7-5363-3732-9/Z·419

I. 中华... II. 古... III. 文学

中国版本图书馆 CIP 数据核字(2004)第 082275 号

中华古典文学丛书

主 编:陈国勇

广州出版社

广州凯旋印刷厂

开本:787×1092 1/32 印张:416.5

版次:2004年12月第1版1次印刷

印数:1-3000 套

书号 ISBN 7-5363-3732-9/Z·419

定价:(全套98本) 999.00元

半夏白术天麻汤 治痰厥头痛。

天麻 白术 半夏各一钱 人参 苍术 陈皮 黄芩 泽泻
茯苓各五分 神曲 麦芽各七分 干姜三分 黄柏二分
水煎。

玉真丸《本事》 治肾厥头痛。

硫黄二两 石膏煨 半夏 硝石研，各一两

虚甚者，去石膏，加钟乳粉一两，生姜糊丸，姜汤下。外
灸关元百壮。

来复丹《和剂》 治上盛下虚。

硝石同硫黄研 玄精石 硫黄各一两 五灵脂水澄去砂 青
皮 陈皮各二两

为末，醋糊丸，米饮下。

生熟地黄丸 治肝虚头痛。

生地 熟地上 天麻 川芎 茯苓下 当归 白芍 黑豆 石
斛 玄参 地骨皮中
蜜丸。

祛风清上散《统旨》 治风热上攻。

酒芩二钱 白芷钱半 防风 柴胡 川芎 荆芥 羌活各一
钱 甘草五分
水煎。

黑锡丹《和剂》 治真头痛。

沉香 附子 胡芦巴 肉桂各五钱 茴香 破故纸 金铃子
肉果 木香各一两 黑锡 硫黄炒成珠，各三两

一方，有阳起石半两，巴戟天一两。酒煮，面糊丸，姜汤
下。

羌活黑附汤^{东垣} 治寒厥头痛。

麻黄 羌活 防风 苍术各一钱 升麻二分 甘草二分 附子一分 白芷三分

水煎。

彻清膏

蔓荆 细辛 薄荷 川芎 藁本 甘草

川芎茶调散《玄珠》

薄荷三钱 川芎一两 荆芥四钱 白芷五钱 细芽茶三钱 黄芩二两，酒炒

头顶痛及脑痛，加细辛藁本、蔓荆子各一钱，每服二三钱，清茶下。

面病章

大意

头面者，诸阳之会也，十二经络，皆上于面而走空窍。经文所以面病俱属三阳之经。汇补

面痛

面痛皆属于热，但暴病多实，久病多虚。饮食妨碍，皆因膏粱风毒。食卧少安，无非胃虚有火。汇补

面肿

面肿曰风。《内经》因食后冒风，风热相搏，上攻头面。能食者，为风虚，更兼麻木。不食者，为风热，必兼红赤。《入

面 浮

劳力过度，饮食失节，脾气输化不及，肺金传布失度，故眼下肿如卧状，将有水肿之虞。若脉浮虚无力，是脾气不足，宜培脾实土。沉实有力，是肺气不顺，宜降气泻水。汇补

面热面寒

手足阳明经气盛，则身已前皆热。《入门》手足阳明经气虚，则身已前皆寒。《灵枢》故风热上冲，则面独热；寒湿上逆，则面反不能耐寒。《入门》

面 疮

风渍皮肤，痰客脏腑，则面黧黯。脾受湿热，肺受风邪，则面疮疡，或痛痒，或红肿，或如粟米，或变五色。又有肺受火邪，咳嗽脓血，面生红疮者，乃肾水不升，肺火独旺也。汇补

治 法

高者抑之，客者散之；血热者宜凉，气虚者宜补，不可专任苦寒降火。若清火补气而不效者，又当开郁。

用 药

胃火，清胃散加黄芩、山栀。风邪，葛根汤加薄荷、荆芥。调脾，六君子汤加升麻、干葛。

附 颊腮症

如肿连齿根者，胃火也。肿及两颐者，胆邪也。仍以能食为风虚，不食为风热。《入门》若湿热为肿，火盛为痛。两耳前后俱肿者，名曰发颐。甘桔汤加薄荷、荆芥、连翘、防风、黄芩、牛蒡主之。

选 方

清胃散

葛根汤

六君子汤

甘桔汤

头风章

大 意

头风，即首风也。新浴中风，即为首风。《内经》头风与头痛无异，浅而近者名头痛，深而远者名头风。《绳墨》

内 因

因风寒入于脑髓也。盖头为诸阳之会，必其人素有痰火，或栉沐取凉，或醉饱仰卧，贼风入脑，致令郁热闷痛。妇人多患此者，因无巾帻以遇风寒也。《入门》

外 候

其状头汗恶风,当先一日则病甚,头痛不可以出内,至其风日则病稍愈。《内经》有头皮浮顽不自觉者,有口舌不知味者,或耳鸣,或目痛,或眉棱之间有一处不若吾体,皆其渐也。《入门》

头风偏正

正头风者,满头皆痛,甚则项强,身体拘急,常兼左右。偏头风,但在半边。在左多血虚有火,或风热。在右多气虚痰郁,或风湿。汇补

头风分辨

血虚者,朝轻夕重。气虚者,朝重夕轻。风热痛者,遇热则发。风湿痛者,阴雨则甚。湿痰痛者,绵密无间,眩晕吐逆。火郁痛者,喜暖畏光,面赤口渴。汇补

头风害眼

木生于春,病在肝,目者肝之窍,肝风动则邪害孔窍也。故有年久头风,便燥目赤眩晕者,乃肺金乘肝,气郁血壅而然,宜清上彻下之法。《入门》世人不知此理,专行苦寒,使火无发越,上攻于目,或专行辛散,使血耗火炎,上瘀于目,宜乎头风之必害眼也。汇补

治 法

宜凉血泻火为主，佐以辛温散表从治。外感发者，散风而邪自去。内伤发者，养血而风自除。汇补

用 药

痰主二陈汤，加苍术、南星。热，加酒芩、连、梔。血，主四物，倍川芎、荆芥。风，加防风、甘菊。欲辛散，少加细辛、薄荷，以开上焦火郁。欲清彻，少加酒大黄，以清上利下。

附 雷头风

内郁痰火，外束风热，故头痛而起核，或脑响如雷鸣，宜清震汤主之。盖雷者，震也。震仰盂，用青荷叶者，象震之形与色也。势重者，先用探吐攻下之法，次用清痰降火之剂。汇补

附 大头风

冒天地不正之气，邪伏经络，上攻清道，故头大如斗，甚则溃裂出脓。治以消毒饮，更视三阳经部分而分治之。俟大便结，然后议下。此先缓后急之法也。设或便未结而遽行之，未有不暗伤元气，邪走内地而变端百出矣。汇补

选 方

二陈汤 治头风湿痰有余之症。

四物汤 治头风血虚不足之症。

透顶散 治头风脑寒。

细辛三茎 瓜蒂七枚 丁香三粒 糯米七粒 脑子 麝各豆
大一粒

为末，随左右头风搐鼻内，良久，出涎升许即愈。

川芎散 治头风郁热。

青黛二钱五分 蔓荆 川芎各一钱二分 郁金 芒硝各一钱
石膏一钱三分 细辛根七分 薄荷二钱 红豆一粒

上为末，搐病人鼻内。

捷径法 偏正头风，用蓖麻子五钱，去壳，大枣十五枚，
共打研如泥，用箸卷之，去筋纳鼻中，良久取下清浊涕即止。
此治痰涎邪气郁于头而成病者。如火郁而成者，用莱菔汁，
仰卧注鼻中，左痛注右，右痛注左。又方，用白芥子五钱，蓖
麻子五粒，川芎、白芷末各一钱，同捣成膏，贴患处，其痛即
减。

清震方《保命》 治雷头风病。

升麻 苍术各四两 荷叶一片

水煎。

新制方 治雷头风病，能清上导下。

半夏一两 大黄二两 天麻 黄芩各六钱 薄荷三钱 甘草
三钱

水泛丸，临卧清茶吞二钱，以痰利为度。

消毒饮东垣 治大头风病。

黄芩 黄连各半两 人参 橘红 玄参 甘草各二钱 连翘
大力子 桔梗 板蓝根 马屁勃各一钱 白僵蚕 升麻 防风 薄
荷 当归各二钱

便开，加大黄一钱，微利之。

目疾章

大意

诸脉皆属于目，目得血而能视。又曰：五脏六腑之精，皆会于目而谓之睛。《内经》太过则壅塞发痛，不及则耗竭失明。子和

内因

表因，风中脑户，湿渍头上，冷灌睛中，或久处烟火，或醉后失枕，或飞冒砂尘，或撞刺扑损，皆伤目之标。里因，过食炙啣生冷，五辛酒面，湿热浸渍，或房室损精，劳役伤气，泣涕伤血，极视伤神，郁怒动火，皆伤目之本。《入门》

外候

目不因火则不痛，如白轮变赤，火乘肺也；肉轮赤肿，火乘脾也；黑珠五色花翳，肾虚火也；神光青睛被翳，肝虚火也；赤脉贯目涩痛，心火自盛也。子和肝热则多肿，心热则多眵。火盛则多痛，水化则多泪。血虚则多酸，气虚则多涩。精竭则眼昏，神竭则眼黑。风胜则痒，热胜则胀，湿胜则烂。《绳墨》

目分五轮

目之五轮，乃脏腑之精华，宗筋之所聚。子和其白属肺，

曰气轮。乌珠属肝，曰风轮，两眦属心，曰血轮。两胞属脾，曰肉轮。瞳神属肾，曰水轮。《入门》

目分八廓

乾为天廓，位两边白睛中间。震为雷廓，位白睛上截小眦。兑为泽廓，位白睛下截向大眦。坤为地廓，属上下两胞。离为火廓，位大小眦。巽为风廓，位乌珠。艮为白廓，位神光。坎为水廓，位瞳子。《入门》

目分经络

目之内眦，太阳经之所起。目之锐眦，少阳经也。目之上纲，太阳经也。目之下纲，阳明经也。足厥阴经，连于目系而已。子和

目分阴阳

瞳子黑眼法于阴，白眼赤脉法于阳，故阴阳合德而精明也。《内经》小儿水在上，火在下，故目明。老人火在上，水在下，故目昏。子和

远视近视

能远视不能近视者，属心虚，阳气不足，阴气有余也。能近视不能远视者，属肾虚，阳气有余，阴气不足也。汇补

阴虚阳虚

肝血不足，眼昏生花，久视无力。肾水欠盈，神光短少，

看一成二，俱属阴虚，当壮水之主，以镇阳光。脾胃不足，九窍不利，目生白翳，阴火不足。手足麻木，两目紧小，俱属阳虚，宜益火之原，以消阴翳。汇补

脉 法

寸脉洪数，心火也。关脉弦数，肝实也。尺脉浮数，阴火也。若浮濡无力，为气虚，微细无力，为阳虚，不可作火治。

治 法

在腑为表，当除散风热。在脏为里，当养血安神。暴发者，在表易治。久病者，在里难痊。《机要》

初宜发散

在内汤药，用平寒辛凉以散火。在外点洗，用辛热辛凉以散邪。若泛用苦寒之药以阻逆之，则郁火内攻，不得散矣。玉纶

久忌点洗

点药莫要干冰片，而冰片大辛大温，若久用之，致积热入目而成昏暗障翳。又或妄用凉茶，冷水挹洗，致令眼瞎。玉纶

治分虚热

实火气有余者，散有余之火，在破气。虚火血不足者，降不足之火，在养阴。《入门》

用 药

初起宜祛风散热，四物加干葛、防风、甘菊、荆芥、胆草、山梔、芩、连、蒺藜、蜜蒙、连翘、蔓荆等，随症加减。久病宜养血滋阴，四物加枸杞、石斛、五味、菟丝子、蒺藜、参、芪、山萸、山药、丹皮、麦门冬等，随病施治。又当以各经报使之药佐之，亦有过服寒凉，以致阳虚。其火转甚则当温补从治，其火自降，目亦自明。此虽百中一二之症，然亦宜谛审也。

附 偷针眼

凡眼内眦头，忽结成胞，三五日便生浓汁，俗呼为偷针。此由热气客于眦间，搏激津液所成。巢氏视其背上，即有细红疮点，以针头破之即瘥，乃解太阳经之客邪也。《医统》

附 雀目眼

雀目乃肝虚之候。盖水生于亥，旺于寅，绝于申，至于酉戌之时，木气衰甚，遇亥始生，至日出于卯，木气稍盛，是以晚暗而晓复明也。宜四物汤补肝肾之不足，否则多变黄胀而死。一法，用苍术入猪肝内煮食即愈。

附 倒睫拳毛

睑属脾，脾受风则拳毛倒睫。《医统》两目紧急，皮缩之所致也。东垣用手扳出内睑向外，速以三棱针出血，以左手爪甲迎其针锋立愈。或用石燕子一对，大者一雌一雄，磨水点搽眼内。先以镊子摘去拳毛，次用药点眼，当以黄连水洗。

选方

清风养血汤 治眼目赤肿疼痛，属外因邪实者。

荆芥 蔓荆 甘菊 防风 川芎 连翘 山栀 当归 黄芩 甘

草

益阴肾气丸 治目暗不明，属肝肾虚衰。

即六味丸去泽泻，加当归、白芍、五味、枸杞、柴胡。

冲和养胃汤 治内障，元气虚弱、心火与三焦俱盛、饮食失节、形体劳役、不得休息者。

黄芪钱半 人参 炙草 当归各一两 白术五钱 防风五钱
黄连 黄芩 柴胡各七钱 干姜一钱 五味二钱 白芍酒炒，六钱
茯苓三钱 升麻 葛根各一两 羌活一两五钱

上剉一两，水煎。

羊肝丸 治内外障翳，青盲肿痛，胬肉侵睛，流泪羞明。

黄连一两 菊花 当归 川芎 防风 荆芥 羌活 薄荷各三钱
生地五钱 白乳 羊肝

上为末，用生羊肝丸，每服三十丸，白汤下。

燥脾丸 治两眼弦烂，湿气所淫。

苍术 防风 半夏 羌活 甘草 陈皮 白芷 柴胡 升麻

养肝丸 治肝血不足。

当归 川芎 车前子 枳实 白芍 蕤仁各等分

蜜丸。

明目地黄丸

即地黄丸加当归、川芎、石斛、麦冬。

捷径法 治眼中云翳。

冬青叶七个 五倍子三钱

水煎一碗，乘热将舌尖蘸入水中，良久其翳自落。

治两目风湿燥痛弦烂者，用

皮硝一两 铜绿 明矾 甘菊 侧柏各三钱 桑白皮五钱

水五碗，煎二碗，洗眼及眉棱骨两太阳，涕出即爽。如胬肉侵睛，用腊月雄猪胆入马牙硝于内，将风吹干为末，入脑、麝点之。

耳病章

大 意

北方黑色，入通于肾，开窍于耳。《内经》分新旧治之，新聋多热，少阳阳明火盛也；旧聋多虚，少阴肾气不足也。汇补

内 因

肾通乎耳，所主者精。精盛则肾气充足，耳闻耳聪。《心法》若疲劳过度，精气先虚，四气得以外入，七情得以内伤，遂致聋聩耳鸣。《大全》

外 候

肾气充盛则耳聪，肾气虚败则耳聋，肾气不足则耳鸣，肾气结热则耳胀。《绳墨》

风 聋

耳者宗脉之所附，宗脉虚而风邪乘之，使经气否而不宣，

是为风聋，内必作痒，或兼头痛。丹溪

厥 聋

十二经络上络于耳，其阴阳诸经，适有交并，则脏气逆而为厥，厥气搏于耳，是谓厥聋，否塞不通，必兼眩晕。丹溪

劳 聋

劳役伤于血气，淫欲耗其真元，憔悴力疲，昏昏愤愤，是谓劳聋，有能将息得宜，则其聋自轻，如日就劳伤，则为久聋。《心法》

虚 聋

虚聋由渐而成，必有兼症可辨。如面颊黧黑者，精脱。少气喘干者，肺虚。目瞤善恐者，肝虚。心神恍惚，惊悸烦躁者，心虚。四肢懒倦，眩晕少食者，脾虚。汇补

脉 法

脉证以肾为主，迟濡为虚，洪动为火，浮大为风，沉涩为气，数实为热，滑利为痰。《入门》

治 法

明窍于耳而能听声者，肺也。因肺主气，一身之气贯于耳故也。凡治耳聋，必先调气开郁。《入门》其次，风为之疏散，热为之清利，虚为之补养，郁为之开导，然后以通耳调气安肾之剂治之。汇补

聋分左右

厚味动胃火则左右俱聋，忿怒动胆火则左聋，色欲动相火则右聋。《入门》

用法

风聋，用清神散，加羌活、防风、细辛、独活。气郁，用二陈汤，加香附、菖蒲、乌药、青皮。劳聋，用补中益气汤，加菖蒲、远志。虚聋，用八珍汤，加菖蒲、远志。精耗，用六味丸，加枸杞、五味。虚炎，用八味丸，加磁石、龟胶。肝胆实火，用小柴胡，加芎、归、山梔。脾胃实火，用清胃散，加黄芩、山梔。肾虚阴火，用地黄汤，加黄柏、知母。

附 耳鸣

耳鸣是痰火上升，壅闭听户，有渐聋之机焉。大抵因痰火在上，又因恼怒而得。怒则气上，少阳之火客于耳也。若肾虚而鸣者，其鸣不甚，当具劳怯之状。《杂著》

附 耳痛

如虫走者风痛，干痛者风热，湿痛者风湿，微痛者虚火。《入门》又有耳后攻击作痛作肿，此是少阳经之湿火。《绳墨》

外用蛇退烧灰存性为末，吹入以治风盛，用枯矾末吹入治风湿，或青箬烧灰吹之亦效，重者内服凉膈散。其肾胆二经火动者，实用小柴胡，虚用逍遥散。